

san duurunan - nimòrò 52

zuwèn kalo - san 1976

bp 24
bamako
mali

dòromè 4 - ccp : 0155

kibaru

a bè bò kalo o kalo, faso ka kibarudiso ka yamaruya kònò

baara kè cogo nyuman

n'an bënnna a kan ko baara kakan ka kè ; ko bëe kakan ka baara kè ; baara suguya bëe, ani baarada suguya bëe la, an kakan fana ka bën a kan ko baara kakan ka kè ni kè cogonyuman ye. okòrò ye mun ye?

jat emi nénaw ka fò la, baara kè cogo fila dòròn de bë dinyè kònò : fòlò : ka baara k'i yèrè ye, mògò kelen walima mògò caman ka bò i ka baara numa.
filanan : ka baara kè mògò kelen, walima mògò caman ye, olu ka bò i ka baara numa.

a kèra cogo o cogo la, baara bë kè nafa de kòsòn ; nafa min tè se ka sòrò, fo ni baara kèra a kè cogo nyuman na. ni mògò min ye baara garabagarabakè, k'a da kòròtò kan, walima ka baara kè k'a sòrò i t'a kè cogo nyuman dòn, o tigi tògò de ye ko : "yèrèsegènna", bawo, foyi t'a figi ye ni nimisa tè.

mògò min fana, n'e ko, k'i b'i ka baara kè nyinan, i n'a fò i tun b'a kè cogo min na salon, walima salonnasini, i k'a dòn k'i bë fili la, fo filiba, n'a y'a sòrò, yèlèma donna o baara kè cogo la, nyininkèlaw ni dònnikèlaw fè.

tuma bëe, an k'an nyè mada, k'an tulo mada kow fè, ni hakilisigilenya ani basigilenya ye, walasa dinyè kana taa k'an to an ka baara cogo kòrlenninw kan, baara cogo minw, n'u sègènw ka bon n'u na-faw ye.

amadou ganyi kantè kibarudilalaw kuntigi

sènèkèminènw don cogo nyuman cikè la

cikèminènw yiriwali baarada ka tònsigi duurunan.

lajèrèba dòkèra bamakò cikèminènw yiriwali baarada konyè nyènabò jekulu fè. k'a ta marisi kalo tile 29 fo a tile 31, baarada in nyèmèdgòw kafora nyògòn kan, bamakò lakòlikaramògòbaw kalan yòrò la. o lajèrè sen fè, u ye ñaniya caman siri yasa baara bë sira sòrò cogo min.

u y'a nyini ko cikèjurudonbaarada n'o ye "esikayèri", ka fèerèw tigè walasa cikèla nyumanw bë se ka sarimisiw sòrò juru la, k'u to cikè yiriwali baaradaw ka hukumu kònò, i n'a fò operasonw.

u y'a kanu cikèminènw yiriwali baarada bolofara dòw ka sigi o operasonw bëe kònò.


u y'u ka nisòndiya jira ka nyèsin baarakè cogo yèlèmali la an ka jamaana kònò. nka u y'a nyini halibi cèsiri ka kè baganw labaloli la, walasa u ka baarakèfanga sòrò.

- u y'a kanu :

- ponpew ka sigi kòlòndunw da la
- tubabundgòw ka jènsèn jamana kònò.

min ye sumanjuw lakanani ye, min ye sumanjw bayèlèmali ye ani malo kanni ni kòori bòli ni tiga lakarili n'a wòrònni ye, tònsigilaw y'a jira ko halibi cèsiri ka kè walasa nin waleninw bë se ka kè ka teliya ani ka nyè.

nyinini min kèra baganbirilaw ba-lo cogo nyuman kan, u y'a kanu o jaabiwkà jènsèn jamana kònò, wa-lasa baganmarala k'otòndò bò jòona.



u y'a jira ko cikèminènw gèlèya ma dogo mògòsi la, o ye fèn ye n'a bë cikèlaw degun kòsèbè o de kòsòn u y'a nyini dò ka fara cikèfènw sòngò kan.

u y'u ka nisòndiya jira numuw danna operasonw ka baara la. u y'a kanu o wale ka jènsèn operasonw bëe kònò.

nyògònye in y'a jira ko jamana nyèmèdgòw hamèye sènè yiriwali ye, yasa jamanadenw na lafiya ni hèrè sòrò. o tuma cikèla, bagan-marala, bololabaarala, aw ye ci-denw ka laadilikanw labato, olu de ye gòfèrènèma ka lasigidenw ye aw kòrò. shèba dun tè fèn jugu yè-rèkè a denw kòrò.

Kibaru kalanbagaw kuma yòrò

ka bò cènbugu

cèkòròba dò kéra yan, a ma foyi fisaya ni kelenya ye, ani bèn ni kenyögònfe. mògò o mògò, n'u y'a fò, a b'a fò : marahaba, bée b'i yèrè ye. ni mògò-o mògò y'a fò ko i ni ce, a b'a fò : marahaba, bée b'i yèrè ye. a y'a sòrò, mògòw b'a wele ko bée b'i yèrè ye.

a ni muso dò kélèla. muso in cè ka foro sira bée témèn cèkòròba ka foro la, muso in ye dègè susu, ka ñoni bò dègè la, ka mògò faga fura kè dègè in na. a témèntò ka taa a ka foro kònò, a sera cèkòròba ma, a ko i ni ce. cèkòròba y'a lamìnè, ko marahaba, bée b'i yèrè ye. muso in ko i tè na dègè minè, i k'a min, sani i ka tilerofana ka na. cèko wa, i ni ce, an ka kélè ban-na bi pewu. cèkòròba ye dègè minè, k'a sigi a kérè fè.

muso in denw tun ye duuru ye. muso ni fila témènna ka taa nyögòn fè, tò saba témèntò, cèkòròba ko a ye : na mòn dègè la, aw ba témèntò y'a di ne ma, kòngò dun tè ne la fòlò. denw ye dègè minè, k'a min, den saba bée y'u da ka sa.

abilayi jara

hakili ni dusu mana kélè, jòn bë se?

ka bò warasala

ni dusu ni hakili kélèla, hakili de bëse dusu la. o sababu ye mun ye ? ni mògò fila bée kélè, ni dusutigi wulila, ni hakiliwa sòròla ka na hakili jira, kélè bë ban pewu.

n'i ye hakili sòrò, i bë fèn bée sòrò. bawo i bë se i ka ga kòrò, i bë se ka dugu mara. n'i y'a ye anw ye kalan sòrò, hakilitigwi de y'a to anw y'a sòrò. bakari fonba.

ka bò golobilaji

ne taara n'buranna la, ne buramuso ye dègè di, ko ne ka dumuni. a ye galamakuru di, min ma dayèlè, ko ne ka dègè min. a tè min ni tasa da ye, galama tè dayèlè, a tè ci. ni aw don, aw bée dègè min cogo di ?

nin misi kelen, kòriju kelen ani dononkòrò nin bë onw fè. misi bë den wolo tile o tile. dononkòrò sen ta o ta, i bë dòròmè kémè ta. dugu jè o jè, i bë tama tan finimugu ta kòri kòrò. waraba nana, k'a bée misi minè. woranin nana, k'a bée dononkòrò nin faga. tasuma nana, k'a bée kòri jeni. aw bée jumèn tila, ka jumèn to yen.

sungalo tarawele

an fè farafinna, nasaraw bënbà ye dulòkiba kala k'a di anw mòkè ma, nka a ma se ka jufa kè a la. an bë don min na bi, anw ye jufa k'a la k'a bila dulòkinin na. o kòrò ye mun ye ? mansa jalo

golobilaji

ka bò warabugu

cèkòròba dò ko ale nyögòn dòn-nikèbaga tè. a ye jamana 6 taama, a m'a nyögòn ye olu la. a nana se jamana wolonwulanen ma, a ma mògò sòrò o dugu la, fo denmisènnin kelenpe. denmisènnin in tun bë buguri la tulonkè la. a ye a nyinika ko : e kòròw dun ? den ko : e yèrè bë u taa yòrò dòn. u taalen bë dinyè ci yòrò la. i faw dun ? olu taalen bë dinyè kala yòrò. i baw dun ? ko min ma daminè u nyèna, u taalen bë o laban yòrò.

cèkòròba ko den ma : ne ma i ka kuma kòrò dòn. a kòrò ye mun ye ? denmisènnin nin ko : n'kòròw taalen bë kélè kè yòrò la, n'fa taalen bë kélè ban yòrò, n'ba fana taalen bë muso tin naminè yòrò la.

nènèjan jalo

ka bò sirakele

mògò tè kegunya mògò saba kò, i tè kegunya tègè saba kò. o ye mògò jumèn ye, o ye tègè jumèn ye ? mahamadu keyita

ka bò werikila

hakili bë se dusu la. sisani, ni mògò témènna i kòrò, k'a sòrò i hakili t'a la, ni dò nana i nyinika, i b'a fò ko i m'a ye, k'a sòrò, nyè y'a ye, nka hakili m'a ye. ni hakili y'a ye, nyè fana y'a ye, ni hakili m'a ye, i b'a fò ko i m'a ye. o kòsòn, ne ko hakili bë se dusu la.

mun na, mògò b'a fò ko fatò ? o kòrò ko hakili t'a fè. o kòsòn, ne ko hakili bë se dusu la.

n'i dusukun farinyana, k'a sòrò hakili t'i la, a bë i ko i ye nalona ma ye. o kòrò ye ko hakili t'i la.

ogisitènsisuma

ka bò kòlòdugukura

ni hakili ni dusu kélèla, hakili de bë se dusu la. hadamadenw ko dògoya tè kélè sa, dusukuntanya de b'a sa.

mògò dusuba, hali dòlòminna ka fisa n'i ye. ni ala ye dusu d'i ma, n'a ma hakili fara a kan, i kéra fatò ye, i kéra dòlòminna ye. ne kòni fè, hakili de bë se dusu la.

bakari damele

tubabugdla bè kè ka fini nyèminè cogo di?

- , a'i b'a fè ka fini don gala la, o k'a sòrò a jèlen don, a sirilen don, a sarannen don, walima a tanpòn-nen don ni buzi ye.
- i bolo bè se minèn o minèn ma, o ka sòrò i kèrèfè.
- banyuwari min bè se ka sigi tasuma kan.
- palanw falen ji saniyalen na.
- tènturi buwatiw.
- mugujèni.
- sodani.
- ji solilan.
- bere min bè kè ka lamagali kè.

n'i y'olu kafo nyògòn kan, i bè tasuma mènè.
finiw ko cogo

i bè sòdani kudu nyè kelen ani mugujèni kudunyè 2 kèliri 7 ji la.


i bè sòrò ka kulðri kudu nyè 1 nòoni ji dòni na. i b'o yèlèma sòdani ni mugujèni ji kan, k'u lamaga nyògòn fè, f'u bè ka nyògòn minè konyuman:



n'i ye galaji goniya, i ka gala donni bè teliya, awa i téna kulðri bérè ta. nka a bè se ka kè ji suma fana na.

nin laadilikan dama dòw to i hakili la.

- kana gala goniyan'a y'a sòrò buzi fini don.
- sani i ka finiw don gala la, i b'a lajè, n'a y'a sòrò u sirilen don konyuman, i b'u nyigin ji la fòld, o ko k'u don gala la.
- sani i ka finiw don, i b'a lajè ni galaji mòna kòsèbè.



- n'i bè buzi finiw don, i b'o kè miniti 20 kòndò.
- i bè fini donnénw bò nyògòn na, k'u da tile la.
- finiw bée dilalen ka ban, i bè sòrò k'u sananko kòsèbè fo sinyè 2 walasa sòdani bè bò u la.
- fini wèrè bè se ka don o galaji kòròw la. nka i bè to ka sòdani ni mugujèni dò fara a kan sòn.
- n'i ka galaji datugùn bali sira, i tè se ka fini don o la o dugusèjè, bawo finyè bè mugujèni tiniyè. o de kòsòn i kan ka sòdani kudu nyè fila kè o ji la, walasa kulðri nya-gami cogo bè nyè ji la.
- tòndò jumèn bè gala don in na.
- a dònbagaw ko anw ye ko perikali pisi kelen bè bèn minibubu 5 n'a musòrò ma.

- perikali pisi kelen songò ye.....
..... dòròmè 1 600 ye

- mugujèni, sòdani, kulðri songò ye..... dòròmè 800 ye

- gaari, buziw, dògò ani gosili bè bèn..... dòròmè 500 ma aw ka wari bòta ye.....
..... dòròmè 2 900 ye

- minibubu kelen songò ye dòròmè 800 ye, o 5 ye dòròmè 4 000 ye aw ka tòndò filè nin ye, n'aw ye

perikali pisi kelen don gala in na.
 $4\ 000 - 2\ 900 = 1\ 100$
o ye dòròmè 1 100 ye.

fulakanmènnaw ka yòrò kaybe! Kaybe! Kaybe.

sakiraabe, dün yo sirri !
nyalooma nyalludò annde o, yinbe hewbe ana cottira on atey bondò, bë mbiya dün atey sikaso.

sakiraabe, kaybe ka'e mon. ñen yinbe yo wuybe. ko burifu bonnde dun, atey mo bë cottirta on o yo nyaw. edèn anndi ne ko buri cellal fu vala.

anndon dun wiide o golle ana bonna innde atey sikaso o, atey mbiye-teedo atey giggol, edèn tayori ne wiide atey sikaso o hebi maneede e adunaaru alla ndu fu.

sakiraabe, o dòn anndi wiide atey giggol o, yo atey kensaado ? o golllaado nyeenyal, on golle waadi duudi sappo e nay.

sakiraabe o dòn anndi wiide atey sikaso o buri ateyji keddidi ? o mo foowtina dàdi, omo itta fanpere.

o mo dannda sarri fayfayru yabbitiindu.

kaye law coode atey sikaso o, mennoron hen sakiraabe mon e gi-yiraabe mon. no tawruðon mo fu kaltonon men miden calmina on.

suruku bè misiw cè la : bin, maloforo kònò

zuwèn kalo daminè na, daramani ye a ka malo foro sènè kosèbè, k'a kuru ci konyuman. zuluye kalo bè se tile 15 la tuma min na, o y'a yèlèma, k'a seri.

a serilen kò dògòkun kelen, a falenna, bawo a kènyèna ni ja ye. malo y'i kan to ko : e, ala dan ka nin kè. n'ye so nyuman sòrò, n'diliw na sinsi dugukolo la, n'na fèrè kosèbè. mògò tè ne tòorò, n'tè mògò tòorò, n'na den caman kè.

a bè tila o kuma la, bin y'i kan to ko : an na fa tigè ka bò i nyè la yan. e nyògònnà dunan ka na malobaliya kuma fò an ka ga kònò yan. anw bè yan, a sanji caman ye nyinan ye. an dagara yan, an bugunna yan. tile ma fèn kè an na, nènè ma fèn kè an na, jankò fèn wèrè.

o kèra tuma min na, yanni ji ka don foro la, binw nana. u ye malo degun. malo y'i kan to ko : e, ala, n'bè nin kè cogo dì ? u bèna n'gèn ka bò n'ka so. ni n'ko : n'bè ci. u bè ne bisi. ne mana dumuni dumani min sòrò, u bè a bòsi n'na. bin y'a jaabi ko : wara dunan tè nyò kari yan.

u mènna o kèlè la kosèbè. malo tora ka janya, walasa a bè finyè sòrò, bawo a nyòn minèlen don bin fè. malo minèna ka pòsòn dòoni dòoni. don dò la, daramani taara bò a ka foro la. a y'i kan to ko : e, bin cayara ne ka foro la. ni n'ma n'jija, bin bèna n'ka foro bòsi n'na, ne ka sègèn bèna kè fu ye.

o dugusèjè, daramani n'a ka gadenw taara foro la. u ye bin bèe bò ka bò foro la. o kèlen, foro jèra. malo y'a yèrè sòrò. a jamannen ko : tabarikala, nin kèra a kè tuma na. n'ka so kèra n'ta ye, n'kèra n'yèrè ta ye. o kèra tuma min na, malo cira kosèbè, ka foro bòe fa. a kala kundayara, k'a d'a kan, ji nana don

malo kòrò, fo ka t'a mò. daramani ye a ka malo kan, a ye bòrè bisaba sòrò a la. a ye caman feere, a ka balo ni malosi bòlen kò a la.

an balima sènèkèlaw, bin bò ani bin shiyèn tuma sera malo forow la. o la, an b'a nyini. aw fè, aw k'aw ji ja o baara la kosèbè. bawo aw bée y'a dòn ko maanyò tè bilen ko fila kè. o kòrò tè dò wèrè ye : n'i

ye maanyò dan, a falentò, bin bè falen a fè. ni i y'a to yen, ni bin y'a degun, maanyò tè barika sòrò, a furaw na bilen. ni u bilenna, i tè den bilenmanw sòrò ka dun.

o la sa, bin bè kòmi, n'i ye suruku bila misiw cè la. ni daramani tun ma malo bin bò, a tun tè malo caman in sòrò. adama antuwani tarawele bugura



barika bè jè la, mògo kelen tè se

ntura saba ani jarakè ye nyògònn sòrò. tile saba, si ma se si la. tile naaninan don, jarakè nana. a ko : ntura fin ani ntura bilen, ne kan fè aw ma. ne kan bè ntura jè ma. ntura fin ani ntura bilen taara, jarakè ye ntura jè kan kari. tile duurunan don, jarakè nana. a ko : ntura fin, ne kan tè e ma, a bè ne ni ntura bilen cè. ntura fin ye i ko di ka

taa. jarakè ye ntura bilen kan kari. tile wòoronan, jarakè nana. a ko : ntura fin, bi ta bè ne ni e cè. jarakè ye ntura fin kan kari.

malidenw, an ka jè, an ka jè komite militèri kò fè, an ka jè kolonèli musa tarawele kò fè ka faso baara.

ya tangara
kucala.